



# QUÆSTIO MEDICA,

QUODLIBETARIIS DISPUTATIONIBUS,  
manè discutienda, in Scholis Medicorum, die Jovis  
vigesimâ-septimâ Novembris.

M. ANTONIO LE CLERC, Doctore  
Medico, Præside.

*An ex eo quod mulier crebrò superfætet, minus bene  
concluditur hominis generatio ab ovo?*

I.

**Q**UOMODO fiat hominis generatio, problema solutu  
difficile, diverforum huc usque fuit systematum occasio.  
Præ cæteris receptissimum istud, quod ab ovo genera-  
tionem hominis instituit. Hujus officina primigenia,  
ovarium muliebre, creditum à veteribus appellatumque testes.  
Illic ovum, in quo singulas hominis futuri partes designatas puta-  
mus, cuditur, conditurque, donec vivacioribus virilis seminis par-  
ticulis ad fecunditatem excitatum, suis & receptaculis, trans tu-  
bas exiliat in uterum: cujus calore forum & humiditate, non prius  
intumescit, quam spiritus ejusdem ovi hospes intimus, antea quasi  
veternosus expergefiat. Præ jugi, præpete turbineaque subtilio-  
rum, quarum centro potissimus insidet, particularum agitatione,  
citius avolaret ille; ni moleculæ seminis utcunque crassiores,  
ad peripheriam abactæ, ocyssimam ipsius fugam sisterent effica-  
citer. His itaque staminibus irretitus opifex, claustra molliore  
nifu primum expandit, varias spargit in uteri fundum à quibus  
origo placentæ radices, præter quas alimentum simul & incre-  
mentum excipiente fœtu, diducta prius inaniaque spatiola sensim

ac sine sensu cogitamus impleri, singulas demum foetus partes haud aliter vicibus evolvi, atque mandata telluri plantarum semina passim explicari videmus.

## I I.

**V**EROSIMILLIMAM hanc humanæ geneleos opificii rationem elevare conantibus placet casum superfœtationis inducere. Secunda nimirum ista conceptio, quæ ut mulierum omnium non est, ita nec omnium graviditatis mensium, ex illorum sensu, posita hominis ab ovo generatione, videtur iis prorsus *admiranda*. Ovum muliebre, inquirunt, statim atque jucunda virilis seminis aura fuit afflatum, domicilii velut pertæsum sui, & quietis impatiens, erumpit illico, hæsurum aliquandiu intra tubæ ductum, vel illinc in uteri fundum usque nulla mora sese projecturum. Si prius, interclusâ virili semini ad ovarium usque viâ omni, palam sit non posse istud applicare sese ad quodpiam ovum; quapropter ad primam conceptionem altera non accedet. Si posterius, ovo in fundum uteri delato, atque per factam sui juris spiritus energieam, pro ampliore loci spatio magis ac magis in dies intumescenti, transformato in embryonem, tunicis aquas capientibus vestitum, è gravitatis legibus sequitur, ut sarcinâ in orificium interius uteri devolutâ, obfignetur id accuratius, quam quod in uterum quidquam penetrare possit, unde gravida superfœtet, oriundum ab ovo jam foetum gerens.

## I I I.

**C**AVEAT porro philosophaturus omnis, quem phænomenon insolens aliquando morabitur, ne in explicandâ difficultate propositâ, inops forsân acrioris judicii, rem quæ esse fieri potest imprudenter inficietur. Prima secundaque conceptio inter se revera cónveniunt, quod virile semen exquisitum esse oportuerit, ova muliebria bene materiata; differunt nihilominus quod in illa spiritus opifex uno ac eodem tempore duplicem insistere possit in utero viam, id est præter utramque tubam ovarium utrumque subire. Si nempe dextro in ovario nullum ei obvium fuerit ovum requisitis insignitum characteribus, ocyus infert se sinistrum in ovarium, illic fœcunditate donaturus ovum aliud, in quod ut par est conformatum inciderit. In hac seu superfœtatione, quam ultra primum alterumque graviditatis mensem fieri posse contendimus, licet ovum, quod ex ovario dextro, verbi gratia, migravit in ejusdem lateris tubam, ibi sistatur, meatum aditu

omni prohibito clausurum. Cur, patenti per tubam sinistram itinere seminalis spiritus illac in ovarium eidem tubæ finitimum sese non insinuabit? ubi obvio sibi primum admotus ovo laudabili fecunditatem haud dubiè largietur, decipiente gravidam mulierem altera, quam minus expectabat generatione.

## I V.

**S**ED esto desilierit fœtus in uteri fundum, atque secundis velut utre tumescentibus, deorsum hoc pondere sic trahatur, rimam ut nullam faciat interius orificium uteri, præter quam admitti quidpiam possit intus postea transmittendum. Id solum accidere constat, quoties & quamdiu grvida mulier erecta stabit; quam mutante situm, supinaque vel prona decumbenti, nemo non intelligit involucra fœtus atque contentas iisdem aquas minus recta minusque graviter incumbere debere interno uteri orificio. Scilicet loco cedunt aliquatenus impedimenta isthæc, virili semini secundum extimam sui peripheriam comiteum præbitura per opportunum. Cuius ubi semel in fundum uteri perrexit, & ejusdem eximio calore continuo rarefactum est, subtilissimæ particulæ in ovarium advolant, futuræ superfœtationis efficacissimæ parentes. cœterum mulieribus quibusdam singulis omnino quinque mensibus, aliis singulis omnino septem periodicè parientibus, difficulter animum induces tuum quæ fœtus intervallo temporis adeo brevi possit & primum ducere suæ fabricationi exordium, & tantum sui corpusculi partium incrementum suscipere.

## V.

**D**ETINETUR in tubis fœtus hebdomadas sex duosve menses, unde cum egreditur, magnitudo illius pollicis est dimidii; nec videtur intra reliquorum graviditatis mensium decursum posse tantum alimoniam sumere, quantum sufficiat oportet, magnitudinem ut assequatur illam, ad quam assurrexit, quando in lucem editur. Persuasum tibi nihilominus esto de generando fœtu altero, vel post quintum mensem à generato priore fœtu. Cum hoc ille quatuor menses utero geritur, & postquam ipsorum origine priorem, maturumque mulier enixa est, superstes in utero posterior nonimestrem maturitatem assecutus, perinde ac prior in lucem prodit. Sic puerperæ lochiorum expurgatione perfunctæ, per mensem, tertio non minus incautè superfœtant, quam secundæ conceptioni prius fuerant obnoxie; utriusque nimirum similis est utique ratio. Sic sex, septem & octo fœtus statâ quinti

4

cujusque mensis periodo, vicibus, nascuntur. Idem sit de septimestri partu deque variis partus humani temporibus, quorum frequentiora prostant exempla, proportionem servatâ, judicium.

*Ergo ex eo quod mulier crebro superfatet, non minus bene  
concluditur hominis generatio ab ovo.*

Domini Doctores disputaturi.

M. Claudius Burlat.

M. Joannes Franciscus Foy-  
Vaillant.

M. Raphaël Manrin.

M. Alexander Petrus Mattot.

M. Alexius Littre.

M. Petrus Crescé.

M. Claudius Bourdelin.

M. Philippus Ignatius Save.

M. Alexander Michaël  
Denyau, Professor Regius;

Proponebat Parisiis EUSEBIUS ADRIANUS THUILLIER,  
Parisinus, Baccalaureus Medicus. A. R. S. H. 1698.

---

Apud Franciscum Muguet, Regis & Facultatis Medicinæ  
Typographum.